

29 APR 1996

Tien-Kebumi

PULUH RIBU HADIRI PENGKEBUMIAN IBU TIEN

Oleh: Haris Syamaun

JAKARTA, 29 April (Bernama) -- Berpuluh-puluh ribu orang menghadiri upacara pengkebumian Wanita Utama Indonesia, Allahyarham Hajah Siti Fatimah Hartinah Soeharto, atau lebih dikenali sebagai Ibu Tien, di makam keluarga Astana Giri Bangun di bekas empayar purbakala Surakarta (Solo), Jawa Tengah, hari ini.

Allahyarham meninggal dunia selepas diserang penyakit jantung ketika berusia 72 tahun, di hospital tentera Gatot Subroto di sini pada pukul 5.10 pagi waktu tempatan semalam.

Jenazah Allahyarham diterbangkan dari Istana Presiden di Jalan Cendana, Jakarta, tengah hari semalam, dan diletakkan di kediaman keluarga Dalem Kaliten di Solo, kira-kira 400 km ke timur dari sini untuk menunggu kepulangan dua anak perempuan, Siti Hardiyanti Rukmana dan Titiek Prabowo dari lawatan ke Paris.

Allahyarham Ibu Tien meninggalkan suami, Presiden Suharto, tiga anak lelaki, Sigit Judhanto, Bambang Trihatmodjo, Hutomo (Tommy) Mandalaputra, tiga anak perempuan, Siti Hardiyanti, Titiek dan Mamiek, dan sembilan cucu.

Semenjak semalam Dalem Kalitan dipenuhi dengan mereka yang berkabung sementara berpuluh-puluh ribu lagi menunggu di luar dengan sabar untuk memberi penghormatan terakhir mereka kepada Wanita Utama itu.

Ayat-ayat suci Al Quran dibaca terus menerus dari ketibaan jenazah di Dalem Kalitan sehingga rombongan pengkebumian meninggalkan perkarangan kediaman itu tengah hari ini.

Laporan radio dan televisyen menyebut rombongan itu memenuhi sepanjang jalan sejauh 37km dari Solo ke makam itu yang terletak di atas Bukit Mangadep, 600 meter atas paras laut.

Antara pemimpin luar yang hadir untuk memberi hormat terakhir dan mengucapkan takziah kepada Suharto dan keluarga beliau di Dalem Kaliten ialah Perdana Menteri Malaysia, Datuk Seri Dr Mahathir Mohamad dan Datin Seri Dr Siti Hasmah Mohd Ali, dan Sultan Hassanal Bolkiah dari Brunei.

Yang lain Presiden Singapura Ong Teng Chiong dan perdana menterinya, Goh Chok Tong, Perdana Menteri Thailand Banharn Silpa-archa dan wakil-wakil kerajaan sahabat.

Makam keluarga Astana Giri Bangun itu ialah satu pembinaan tiga tingkat yang dibina pada tahun 1990 dengan harga kira-kira Rp450 juta (AS\$195,650).

Tingkat bawah dipanggil Astana Argotuwuh, tingkat dua, Astana Argokembang dan teratas Astana Argosari, di mana Ibu Tien dikebumikan.

Satu barisan penghormatan penuh tentera mendahului keberangkatan jenazah dari Dalem Kalitan ke makam itu yang mengambil masa 90 minit.

-- BERNAMA

HS WAT AHH